



DR HARUN (empat dari kanan, barisan hadapan) bergambar bersama pemenang anugerah dan pegawai kanan UMS.

UMS bakal terima geran penyelidikan lebih besar

DE 6.6.2013 G

Hayati Dzulkifli

KOTA KINABALU: Universiti Malaysia Sabah (UMS) akan mendapat geran penyelidikan yang lebih besar berbanding tahun lalu kata Naib Canselor Prof. Datuk Dr Mohd Harun Abdullah.

Beliau berkata universiti ini mendapat lebih dari 20 geran pada tahun ini yang diberikan oleh Kementerian terutamanya Kementerian Pengajian Tinggi dan yang lain seperti Kementerian Sains, Teknologi dan Inovasi (Mosti).

“Trend meningkat (dalam penerimaan geran) ini yang mana amat memberangsangkan menggambarkan keupayaan pensyarah dan pengkaji UMS untuk maju.

“Kebanyakan geran diperolehi melalui Skim Geran Asas Penyelidikan (FGRS) dan beberapa skim bertujuan untuk melakukan kajian sama dengan universiti-universiti lain,” katanya

Dr Harun berkata demikian kepada pemberita selepas menghadiri majlis makan tengah hari bersama pemenang anugerah pameran 2013 peringkat kebangsaan di Bangunan Canselor UMS pada Selasa lalu.

Sejumlah 30 peserta mewakili UMS bertanding dalam dua pameran-Expo Teknologi Malaysia (MTE) 2013 pada 21 hingga 23 Februari 2013 dan Pameran Rekaan, Inovasi & Teknologi Antarabangsa (ITEX) 2013 dari 9 hingga 11 Mei di Kuala Lumpur.

Daripada 30 peserta, UMS menggondol sembilan pingat emas, lapan perak, sembilan gangsa, empat sijil dan satu anugerah khas - Pereka Wanita Tahunan dianugerahkan kepada Jinky Jane C. Simeon untuk rekaannya yang diberi nama U9 Xlophone.

Dr Harun berkata trend meningkat yang positif dalam penerimaan geran juga selaras dengan objektif UMS untuk mengeluarkan lebih banyak penyelidikan berimpak besar.

Sebagai tambahan, beliau berkata penyelidikan bersama dengan universiti-universiti lain di negara ini juga bertambah.

“Dalam melaksanakan penyelidikan besar, lebih banyak pakar diperlukan untuk menghasilkan kajian berkualiti tinggi, dengan mengatakan ini, saya melihat mempunyai lebih ramai pensyarah kanan yang berpengalaman akan membantu UMS untuk mendapatkan lebih banyak geran untuk penyelidikan kami.

“Oleh itu, kerjasama rangkaian dari semua pihak dari semua tahap akan membantu kami mendapat lebih banyak geran,” katanya.

Terdahulu, Dr Harun berkata UMS melancarkan pelan strategik 2013-2017 dengan tema ‘Mengekalkan Kecemerlangan Ke Arah Penonjolan Antarabangsa’ yang di dalamnya mempunyai tujuh Bidang Keberhasilan Utama UMS (UMS-KRA)

“Salah satu daripadanya ialah memfokus kepada penyelidikan dan inovasi dengan meningkatkan kecemerlangan dalam kedua-dua aspek dengan sasaran 50 peratus peningkatan dalam penerimaan anugerah sama ada dalam pameran ataupun pertandingan di peringkat kebangsaan mahupun antarabangsa.

“Justeru itu, penyertaan penyelidik dan pensyarah dalam pameran berkaitan penting untuk merealisasikan UMS-KRA dan mempromosi serta memartabatkan UMS di arena global,” katanya.

Dr Harun berkata, kriteria seumpama itu juga disertakan dalam Penilaian Penyelidikan Malaysia (MRA) yang merupakan keutamaan universiti itu untuk mencapai rating lima bintang oleh Kementerian Pendidikan.

Selain daripada itu, UMS juga ingin memastikan produk-produk hasil inovasinya yang telah diiktiraf akan dapat dikomersilkan.